

TARIKH : 29 NOVEMBER 2022
AKHBAR : BERITA HARIAN
MUKA SURAT : 26

Kerajaan dijangka beri keutamaan atasi kos sara hidup

Kerajaan dijangka beri keutamaan atasi kos sara hidup

Kerajaan baharu pimpinan Datuk Seri Anwar Ibrahim dijangka memberi keutamaan dalam menangi peningkatan kos sara hidup, meskipun negara berdepan dengan tekanan harga yang tinggi tahun hadapan, demikian mengikut penganalisis.

Penganalisis CGS-CIMB, Nazmi Idrus, berkata pada mesyuarat dasar monetari Bank Negara Malaysia (BNM) baru-baru ini, menekankan jangkaan inflasi utama yang akan kekal tinggi tahun hadapan di tengah tekanan permintaan dan kos.

Bagaimanapun, katanya, peralihan kerajaan baharu pimpinan Perdana Menteri ke-10 dijangka mengandungan usaha membendung inflasi diteruskan selaras dengan ikrar yang diberikan untuk memberi keutamaan dalam menangani peningkatan kos sara hidup.

"Justeru, kami mengekalkan unjuran Harga Indeks Pengguna (IHP) pada 3.1 peratus pada 2022 dan 3.2 peratus pada 2023.

"Pada pandangan kami, peningkatan berterusan dalam

inflasi teras boleh menunjukkan pengetatan dasar monetari selanjutnya," katanya dalam nota penyelidikan.

Inflasi utama Malaysia menurun kepada 4 peratus pada Oktober daripada 4.5 peratus pada September.

Angka itu menjangkau unjuran konsensus Bloomberg sebanyak 10 mata asas.

Bagi asas bulan ke bulan, pertumbuhan inflasi utama meningkat sebanyak 0.2 peratus pada Oktober berbanding 0.1 peratus pada September.

Inflasi teras meningkat kepada 4.1 peratus pada Oktober daripada 4.0 peratus pada September.

Inflasi teras tidak termasuk bahan api untuk kenderaan (RON95, RON97 dan diesel) menyaksikan inflasi meningkat kepada 4 peratus tahun ke tahun pada Oktober.

Kesan asas rendah yang berkurangan dalam komponen utiliti dan perumahan yang direkodkan kepada 1.5 peratus tahun ke tahun pada Oktober telah menyumbang kepada peningkatan sederhana inflasi utama pada bulan dikaji.

Makanan dan minuman bukan alkohol meningkat kepada 7.1 peratus tahun ke tahun pada Oktober daripada 6.8 peratus pada September.

Harga barangan yang ditadbir seperti subkomponen minyak dan lemak menyederhana kepada 2.6 peratus daripada 3.8 peratus pada September, sementara kos pengangkutan kukuh 5.2 peratus, terutama disebabkan RON97 me-

ningkat daripada RM2.84 seliter pada 2021 kepada RM3.96 pada Oktober.

"Inflasi utama menjadi sederhana apabila kesan asas yang rendah semakin berkurangan, bersama penurunan harga komoditi," tambah Nazmi.

Sementara itu, MIDF Research dalam nota penyelidikan berkata, dalam persekitaran harga komoditi global yang meningkat, tekanan inflasi di Malaysia dipengaruhi oleh inflasi makanan lebih tinggi.

Permintaan domestik kukuh

Katanya, firma penyelidik itu menjangkakan pertumbuhan harga makanan mencatatkan pada 5.5 peratus tahun ini antara lain disebabkan susut nilai selanjutnya ringgit berbanding dolar Amerika Syarikat (AS).

"Dengan pengukuhan permintaan domestik, kami menaik taraf ramalan IHP utama sedikit iaitu 0.2 mata peratusan kepada 3.0 peratus tahun ini," katanya.

Menurut firma penyelidik, melangkah ke tahun hadapan,

faktor tolakan penawaran terhadap inflasi dijangka berkurangan antara lain disokong peningkatan nilai ringgit, harga makanan yang sederhana, tekanan rantaian bekalan global yang semakin mereda dan harga komoditi yang normal.

"Terima kasih kepada Pilihan Raya Umum Ke-15 (PRU15) kerana tinjauan inflasi Malaysia lebih jelas untuk tahun hadapan kerana kami menjangkakan kerajaan perpaduan yang baharu dibentuk berkemungkinan besar mengekalkan status quo mekanisme subsidi bahan api semasa.

"Seperti berpandukan pelan tindakan manifesto Pakatan Harapan (PH), kerajaan pimpinan PH mungkin mengkaji semula amalan monopoli ke atas beberapa barangan berkaitan pertanian dengan idea untuk meningkatkan bekalan keluaran dan menurunkan harga makanan.

"Jika status quo pada subsidi bahan api, maka inflasi utama diramalkan berlegar antara 2.3 hingga 2.5 peratus pada 2023," katanya.

Peningkatan berterusan dalam inflasi teras boleh menunjukkan pengetatan dasar monetari selanjutnya

Nazmi Idrus, Penganalisis CGS-CIMB

